

ISABEL CARTA NAJ SAN PEDRO

Yichebanil iscarta naj Pedro

¹ Hanin Pedro inti'an, ischejab Comam Jesucristo wehan. Chintz'ibñetojan hune' carta ti' teyet hex ayexxaco yul isk'ab Comam pujanilto yul ismajul Ponto, yeb Galacia, yeb Capadocia, yeb Asia, yeb yul ismajul Bitinia. ² Hex ti' sic'bilexxa yu Comam Dios Mame haca'tic'a yu istxumni Comam yet caw payat. Yu Yespíritu Comam, yuxin quexyacanico yetoj, yurñe heyijen tzet chal Comam Jesucristo, cat hesajbicanu yu isch'iquil Comam. Yak'ab Comam tx'i'al isc'ulch'anil isc'ul yeb ak'anc'ulal teyet.

Comam Jesucristo ayco yipo janma

³ Jalawe c'ulla tzotí' yir Comam Dios, ismam Comam Jesucristo. Yu isc'ulch'anil isc'ul Comam Dios jir, yuxin yak' Comam hune' cok'inal caw ac'to; ha' hune' tu' ayco yipo janma. Hune' ti' xatzujcha ju yuto itzitzbicañ Comam Jesucristo xol camom yu yip Comam Dios. ⁴ Xayak' Comam Dios cok'inal yu cochahni tzet c'ubabil jet yu Comam yul satcañ. Hune' tu', mach chi'etaxtoj, machi tz'il chihitzico yir, yebpaxo xin maxtic'a chitañiloj. ⁵ Yuto xajayto yul janma yir Comam Dios, yuxin chorisc'uba Comam yu yip yurñe istzujcha apno cocolbanil t'iñanxa ye yu Comam, hune' chiyelax yet ch'apni islahobal tz'ayic.

6 Yu hune' ti', yuxin caw choñtzalahi, waxańca yilal jec' yiñej isya'tajil hanic'oxa tiempohal.
7 Haca' ch'en oro, caw yilal chi'ilwelax ch'en xol k'a k'a' yuñe yilchaloj ta caw c'ul ch'en maca ta mach c'ulo ch'en. Hacoripax tu', caw yilal choñilwelaxi, cat yilchaloj tato caw yeli ayco janma yiñ Comam Dios maca mach xin. Hayet chitecha ilwebal ju xin yu ayco janma yiñ Comam, ec'bal yelapno hune' tu' yul sat Comam Dios sata ch'en oro chiilwelax tu', waxańca xin chitanilo ch'en. Yaj ta chitecha ilwebal ju, caw chitzala Comam Jesucristo jir yet chihul Comam, cat yak'ni Comam issak'asil iscul jet, yeb caw ay yelapno choñielcanico yul sat.

8 Waxańca matxa heyil Comam Jesucristo, yaja' xahan ay Comam heyu. Waxańca mach lañano heyilni, yaja' cheyayto yul heyanma yiñ Comam, yuxin caw chextzalacanoj. Ha' hune' hetzalahilal tu', caw c'ulch'ancanoj, machi tzoti' chik'oji yalnilo isculch'anil teyet. **9** Yuto xatzujcha apno hecolbanil heyu yu heyaco heyanma yiñ Comam.

10 Ebnaj ischejab Comam Dios ec'lena yet payxa, tzotel ebnaj yiñ hanta isculch'anil Comam Dios chak' jet. Issayni ebnaj yiñ nanc'ulal yiñ caw tzet yelapno ye colbanile ti'. **11** Ha' Yespíritu Comam Cristo ayco yiñ ebnaj, ha' ak'ni yohtañelo ebnaj yiñ tzet chu yec'ya' yanma Comam Cristo, yeb xin isculch'anil chihul yet chiyijni isba tu'. Ha' ebnaj tu' issay ebnaj yila' mac hune' chal Yespíritu tu' yeb yiñ tzet tiempohal chu huntek'an tu'. **12** Yaja' yak' Comam Dios yohtañelo ebnaj tato ha' huntek'an cuybanil yal ebnaj tu', mach yeto ebnaj yehi; to jet ye hañoñ ti'. Tinañ xin, xaak'lax heyohtañelo

yu ebnaj pujbanic'o Tzoti' yet colbanile yu ishe-lanil Comam Espíritu Santo alaxti yul satcañ. ¡Ha' huntek'an tu' xin, caw yoche ebnaj ángel yila'!

Choche Comam Dios tato c'ul chijute coba

¹³ Yuxin helanojab cheyute heba, txumwe yiñ tzet chewatx'e, cawxojab hec'ul yiñ isc'ulch'anil isc'ul Comam Dios chak' jet yet chul Comam Jesucristo hunelxa. ¹⁴ Hex ti', yuninalxa Comam Dios heyehi caw yijemex tet Comam yuxin matxa chexec' yiñ heyochento tzettaj tx'oj hewatx'e yet yalaritocanoj, yet mañto cheyohtarielo Comam Dios. ¹⁵ Wal xin ec'aríwe yiñ isc'ulal, machojab nino istx'ojal chewatx'e, yuto Comam Dios quexawtereni, caw machi nich'ano istx'ojal yiñ Comam. ¹⁶ Yuto chal Comam yul Yum haca'ti': "Ec'añwe yiñ isc'ulal, machojab nino istx'ojal teyiñ yuto haninti'an machi nich'ano intx'ojal wiñan,"* xi Comam.

¹⁷ Ha' Comam Dios tu', chi'ilni tzet chielico hunun anma hatatic'a tzet chiswatx'e. Caw lahan chi'ilchati anma yu Comam, machi hunu ti' cheba'ito Comam ismul. Yuxin tato chijal Comam Dios Comamoj, ayojab yelapno Comam yul cosat yulbal ayoritoc'o yul sat yibarñk'inal ti'.

¹⁸ Comam Dios xacorñiscolilo yiñ hune' cobeybal matzet chaliloj, hune' cochah tet comam comi'. Jothtaj ta cocolbanil mach lok'bilo yu tzet chitañiloj yul sat yibarñk'inal ti' haca' ch'en oro yeb ch'en plata. ¹⁹ Wal xin ha' ischiq'uil Comam Jesucristo caw niman yelapnoj, ha' k'ojo islok'ni cocolbanil. Ak'lax camo Comam yu yoc xahanbalil, haca'

* **1:16** Lv 11:44-45; 19:2

hunu no' me' machi nich'ano isya'bil, machipaxo istzaca'il. ²⁰ Nabilxatic'a hune' ti' yiñ Comam yet mañto chiwatx'i hune' yul sat yibañk'inal ti' yu Comam Dios. Yaj wal tinañ xin xaisyecan isba Comam Jesucristo yiñ islahobal tz'ayic ti' yu yak'lax isc'ulal jet. ²¹ Yu Comam Jesucristo, yuxin xajaco janma yiñ Comam Dios. Ha' Comam Dios ak'ni itzitzbocan Comam Jesucristo xol anma camom, yak'ni isc'ulch'anil isc'ul tet. Yu Comam Jesús tu', yuxin chijaco janma yiñ Comam Dios, cat xin iscawxipaxo coc'ul yiñ Comam.

²² Wal tinañ xin yu xacoyije hune' cuybanil caw yel chala, yuxin sajxa ye janma yu Comam Dios. Hac tu' xin xahan chijil ebnaj juxtaj yeb ebix janab, yuxin caw yilal coxahanrien coba yiñ sunil janma yeb xin yiñ sunil jip. ²³ Yuto pitzc'anajoñxa yet iscayel yaj mach yiño comam comi' cambehal yehi, wal xin yu Istzoti' Comam Dios pitzc'anajoñxa. Yuto ha' Istzoti' Comam caw itzitz, ayñetic'a yiñ sunilbal tiempo. ²⁴ Yuto chiyal yul Yum Comam Dios haca' ti':

Sunil anma lahan haca' te' telaj, haxa iscaril ye
xin, lahan haca' isxumaquil te' telaj tu',
chitajilo te' cat ishowayo isxumaquil te'.

²⁵ Yaj wal Istzoti' Comam Dios Jahawil,
ayñetic'ac'o yiñ sunilbal tiempo,* xiayoj.

Ha' ton xin hune' ti' Tzoti' c'ul yet colbanile halbilxa jabe'.

2

¹ Yuxin awecano sunil istx'ojal; sunil etal, yeb xin lek'ti'al, yeb ischiwa hec'ul, yeb hehobnicañ

* ^{1:25} Is 40:6-8

tzoti'. ²⁻³ Ta caw yeli xaheyohtañelo sic'lebil ta c'ul Comam Dios jiñ, haca'ojab yochen huno nich'an nene' yim ismi', hacojab tu' heyochen hune' cuybanile yet Comam Dios mach sombiloj, hac tu' xin cheyik' heyip yiñ hecolbanil.

Comam Cristo lahan haca' hunu ch'en ch'en niman yelapnoj ch'ayto xe'o ña

⁴ Hitzojoñweco isc'atarí Comam Jesucristo, caw itzitz Comam. Comam Cristo tu' lahan haca' hunu ch'en ch'en caw niman yelapnoj ayayto xe'o ña. Yaja' xin k'ojbilcanilo ch'en yu ebnaj watx'emcañ ña, yaj wal xin Comam Dios sic'nicanicoj yeb caw niman yelapno ye yul sat. ⁵ Wal xin itzitz Comam Cristo, yuxin itzitzoñpaxoj yiñ Comam, xin jak'a'we hamanil tet Comam Dios cohunico yiñ Comam Cristo yatutoj, yeb xin coñiyapaxico Comam sacerdotehal, yetxa Comam jehi. Yu Comam Jesucristo yuxin chu jak'ni coba xahanbalil tet Comam yet chicoyijen tzet chala. Ha' hune' tu', caw c'ul yul sat Comam Dios. ⁶ Yuto chal yul Yum Comam Dios haca' ti':

Yul coñob Sión wacojan hune' mac haca' ch'en ch'en ch'ayto xe'o yipo ña. Ha' hune' ch'en ch'en tu' sic'bililo ch'en wuhan, caw niman yelapno ye ch'en. Ha' mac chaco yanma yiñ hune' mac tu', mach chican yiñ tx'ixwilal,* xiayoj.

⁷ Hañon chijayto yul janma yiñ Comam Cristo, caw niman yelapno ye Comam yul cosat, yaj wal mac mach chiyaco yanma yiñ Comam, ha' yiñ huntek'an tu' tz'ibñebilcano yul Yum Comam bay chal haca' ti':

* ^{2:6} Is 28:16

Ha' hune' ch'en ch'en k'ojbilcanilo yiñ ismunil yu
ebnaj watx'em ña, ha' ch'en caw c'ul yoc
xe'o ña,* xiayoj.

8 Chalpaxo yul Yum Comam haca' ti':
Ha' hune' ch'en ch'en ti', ha' bay chitxak'mo anma
cat yayc'ayi,* xiayoj.
Chitxak'mo anma yuto machi isyije tzet chal Ist-
zoti' Comam Dios; halbilcanoj xin tato hac tu'
chiyu anma tu'.

Iscorobxa Comam Dios je tinañ

9 Waloñ ti' iscorobxa Comam jehi sic'biloñxalo
yu Comam, sacerdoteoñ yiñ ismunil Comam Dios
Jahawil, hune' niman coñob nanxa yehiloj yu
Comam. Sic'bilonixala yu Comam yu joc yeto Co-
mam yuñe joc copujbanic'o isc'ulch'anil Comam.
Xaconiyilo Comam Dios xol k'ejholo, coñyanico
xol hune' issajilk'inal caw c'ulcanoj. **10** Yet payat
mach iscorobo Comam Dios heyehi, yaj wal tinañ
iscorobxa Comam heyehi. Yet payat tu', machi
mac chitz'ay isc'ul teyiñ, yaja' tinañ chitz'ay isc'ul
Comam Dios teyiñ.

Ha' coyijen tzet chal Comam Dios ha'ojab chiju

11 Hex wuxtaj, hex wanab, hex xahan ay
wuti'an, hañioñ ti' mach cocorobo hune' yul
sat yibañk'inal ti', toñe choñeq'ui; yuxin
chintak'ecantajan teyet, mach chebeybalñe
huntek'an tzet chiyoche henimanil, yuto ha'
huntek'an istx'ojal tu' chiyak'le howal yeb
janma.* **12** C'ulojab cheyute hebeybal xol anma
mañto ohtañe Comam Dios, waxañca xin

* **2:7** Sal 118:22 * **2:8** Is 8:14-15 * **2:11** Sal 119:19

chexhallax tx'ojal tinañ haca'tarëe caw ay hemul, yaja' yu isc'ulal cheye, yuxin chal ebnaj c'ulla tzotí' yiñ Comam Dios yet chi'ilchatí sunil anma yiñ hune' tz'ayic yet chul Comam.

¹³ Yuñe mach chiel ispixan Comam Dios heyu yijemojab cheyute heba tet ebnaj ayicto yul capil, hactic'apax tu' tet naj jahaw, yuto ec'na aycañ yip ismunil naj. ¹⁴ Cat heyijenpaxo tzet chal ebnaj yahaw ak'bil ismunil yu naj yanico anma yiñ isya'tajil yet chiyanico ismul, cat yalni ebnaj c'ulla tzotí' yiñ mac c'ul tzet chiswatx'e. ¹⁵ Choche Comam Dios ta caw c'ul cheyute hebeybal, ha' xin wal matzet tz'aj yala' anma tx'oj isnabal teyiñ yeb anma ayco yiñ issucal.

¹⁶ Ec'añwe yiñ isc'ulal yuto colbilexxa. Yaja' matolo yu xahechah hecolbanil tu' yuxin chexoc hewatx'e' istx'ojal, ¡machoj! To ischejabxa Comam Dios heyehi. ¹⁷ Xiwañwe tet Comam Dios, cat xin hexahanrienpaxo anma ayxaco yul isk'ab Comam. Ayojab yelapno ye heyet anmahil yul hesat, yebpaxo naj jahaw, ayojab yelapno ye naj yul hesat.

Yabe Comam Jesucristo isya'tajil

¹⁸ Hex chejab heyehi, ayojab yelapno heyahaw yul hesat, yijewe tzet chiyal ebnaj. Yaj mañuetaj tet ebnaj c'ul isnabal, yeb ebnaj caw c'ul isc'ul, wal xin yijewepaxo tet ebnaj toñe chichichon yanma. ¹⁹ Yuxin ta yu ayco conabal yiñ Comam Dios, yuxin toñe choñetalaxi, machi xin comul, yaj ta chitecha ju, caw chitzala Comam Dios jiñ. ²⁰ Yaja' ta yu hunu istx'ojal chiju yuxin choñoc yiñ isya'tajil cat xin jak'ni techahoj, caw matzet

chaliloj yuto comultic'a yehi. Yaj ta yu hunu isc'ulal chicowatx'e, cat yak'lax isya'tajil jila', cat jak'ni techahoj, wal hune' tu' caw niman tzet chalilo yul sat Comam Dios.

21 Yu hune' tu' yuxin coñyawte Comam. Hayet yec'ya' yanma Comam Cristo ju, isyenicano Comam yiñ tzet chu cobeybalñeni. **22** Machi nino ismul Comam yacoj, machipaxo lek'ti'al yala.* **23** Hayet isbuchlax Comam, machi ispajtze. Hayet yalaxico Comam yiñ isya'tajil yu ebnaj, machi yalpaxo Comam howalil. Ha' hune' yute Comam, torñe yabeñeto isba yul isk'ab Comam Dios, yuto yohta Comam tato ha' Comam Dios ch'ilni tzet ch'elico yiñ istoholal.* **24** Ha' Comam Jesucristo ijnicanocañ comul yiñ isnimanil yet iscam yiñ te' culus. Hac tu' xin matxa chu yak'ni cabo isba istx'ojal jirñ, yuto camnajoñxalo yiñ mule, hac tu' utebilonçano yu Comam, yuxin chu cowatx'enico cobeybal yiñ istoholal. Caw yabe Comam isya'tajil yiñ isnimanil ju yurñe cocolcha yul isk'ab hune' yabil ayco yiñ janma, ha' ton comul.* **25** Hayet yalarñtu tu', lahanex haca' no' me' c'aynatoj, wal tinañ xin xaquexmeltzoco yul isk'ab Comam Cristo, yuxin haxa Comam chextañeni yeb xin ha' ch'ilni heyanma.*

3

Cuybanile yiñ anma mohyomxa

1 Hacpax tu' ex ixale hex ti', yijem cheyute heba tet heyichamil, haxinwal ta ayex ti' mañto

* **2:22** Is 53:9 * **2:23** Is 53:7 * **2:24** Is 53:5 * **2:25** Is 53:6

chaco yanma heyichamil yiñ Istzoti' Comam Dios, chistxum isba ebnaj heyu, mach yechto tx'i'l'al tzet cheyal tet ebnaj. ² Yuto chiyil ebnaj tato caw tohol hebeybal, yeb ta caw yijemex.

³ C'ulojab cheyute heba, maxtaj hetzanten heba yiñ lolol'haca' hemamen xil hewi' yiñ caw nanxa islowi, maca heyanico heyanma yiñ ch'en ome maca ch'en uwe caw aycar̄ istohol haca' ch'en oro, yebpaxo yiñ xilk'ape caw aycar̄ istohol, yuto maxtaj huntek'an tu' chēxwatx'enico yul sat Comam Dios. ⁴ Wal xin ha'ojab isc'ulch'anil heyanma ha' cheyil hewatx'e', haxinwal caw c'ulch'anex yul sat Comam Dios. Ha' hune' hec'ulch'anil tu', ha' ton isc'ulal hec'ul yeb ak'anc'ulal yul heyanma, ha' hune' tu' machi bak'inal chietaxtoj, caw ay yelapno ye yul sat Comam Dios. ⁵ Hacpax tu' huntek'an ebix ix yet Comam Dios yet payat, caw c'ulch'an yanma ebix yul sat Comam Dios yuto hañech'an Comam yaco ebix yipo yanma, yeb xin caw yijem yute isba ebix tet yichamil.

⁶ Haca' ix Sara, caw yijem yute isba ix tet naj Abraham. Yalni ix yiñ naj haca' ti': "Mam," xi ix yiñ naj. Yuxin c'ul cheyute henabal hex ixale hex ti'. Machojab hunu tzet ye tu' bay cheixxiwi. Ta chewatx'e haca' tu' lahan henabal haca' ix Sara.

⁷ Haquexpax tu' hex ichamile hex ti', c'ul cheyute heyanma yiñ heyixal. Ohtañeweloj ta lahan ebix haca' hunu vaso nab isphoi. Ayojab yelapno ye ebix yul hesat yuto lahan cok'inal chic-ochah tet Comam yeb ebix. Yuxin c'ul cheyute heba yiñ ebix yuñe matzet ch'oc hexolbal yet chexoc txahlo tet Comam.

Ay bay chijil isya'tajil yu cowatx'en isc'ulal

⁸ Yebpaxo xin chiwaltojan hunxa ti' teyet, hunxañehojab cheyute henabal hesunil. C'ulch'anojab cheyute hec'ul, xahanojab cheyil heba hununex yuto heyuxtaxa heba, heyanabxapaxo ebix ix yiñ Comam. Tz'ayojab hec'ul teyiñ hununex, chewchotañe cheyute heba. ⁹ Mach chepajtze tx'oj tet mac tx'oj chiswatx'e teyiñ. Machica chexpohli yiñ mac chipohli teyiñ, ha' heyet c'ulch'an cheyute heyak'ni ispac tet anma, yuto awtebilexxa yu Comam yu hechahni isc'ulch'anil isc'ul. ¹⁰ Yuto chal yul Yum Comam haca' ti':

Tato ay mac choche issahanñe hune' iscawil, yeb ta choche tzalahilalñetic'a ch'ec'hunun tz'ayic yila', caw yilal iscachni isti', machojab chal tzoti' tx'oj yeb xin lek'ti'al.

¹¹ Caw yilal isphohnilo isba xol istx'ojal, c'ulojab tzet chiswatx'e, issaya'bilo ak'anc'ulal ha'ojabñetic'a xin chiswatx'e.

¹² Yuto Comam Dios Jahawil, chitañen mac caw c'ul isbeybal, cat xin yabenpaxo Comam istxah. Walpaxo anma machiswalil chiyute isba xin, chiscaj Comam, * xiayoj.

¹³ Ta harie isc'ulal chesaya, cat hebelwi yiñ caw c'ul, ¿mactic'a chiutenico istx'ojal teyiñ? Machi maca. ¹⁴ Yaj tato cheyabe isya'tajil yu isc'ulal chebeybalñe jcaw sak'al heyet! yuxin mach chexxiw tet hunuxa mac anmahil. Mach cheyak' cabconocañ heyanma. ¹⁵ Wal xin ak'awe tzalaho heyanma yiñ Comam Cristo Jahawil. Ayojab

* **3:12** Sal 34:12-16

yelapno Comam yul hesat. Helan cheyute heba hetak'wi tet mac chik'amben teyet yiñ cuybanile bay ayco heyanma. Chewchotañeojab chu heyalni tet anma tu' yeb yiñ ak'anc'ulal. ¹⁶ Yuxin c'ul cheyute heba, hac tu' xin ak'anc'ulalñetic'a ye henabal, haxinwal macta tx'ojoj istzotel teyiñ yu isc'ulal chewatx'e yu ayexxaco yiñ Comam Cristo, chitx'ixwicañ yiñ lek'ti'al chal teyiñ.

¹⁷ Caw c'ul ta yu cowatx'en isc'ulal yuxin chiec'ya' janma yaj ta hac tu' ch'el yiñ yanma Comam Dios, sata ta chec'ya' janma yu cowatx'en istx'ojal, nabñe hune' tu'.

¹⁸ Yuto hac tu' yu iscam Comam Cristo istohlan comul yiñ hunelñe. Caw c'ul Comam yaj ec'ya' yanma ju hañoñ mulumoñ ti' yu coriyinito Comam tet Comam Dios. Ha' isnimanil Comam cami, yaja' yanma Comam machi cami. ¹⁹ Hayet camom Comam tu', beyc'o yanma Comam yala' Istzoti' Comam Dios tet anma camom majan xol isya'tajil. ²⁰ Ha' huntek'an anma tu', mañc'on tzet yal Comam Dios yet payxa yulbal istiempohal yet iswatx'en naj Noé te' barco. Yet hune' tiempohal tu' caw niman yute isc'ul Comam yiñ anma yet yechman iswatx'i te' barco tu', yaj xin waxajwaññe anma colchalo xol ha ha' yul te' barco. ²¹ Ha' hune' ha ha' tu' yechelñe ik'bil yu ha' tato choñcolchahi. Ha' yelapno ye hun tu', *choñcolchahi*, maxtaj yu yel istz'ilal conimanil yu ha', to hayet chiahcano ha' cowi' chicoyeniloj tato c'ulxa conabal sata Comam yuto xaitzitzbicañ Comam Jesucristo. ²² To Comam yul satcañ, tinañ ayco Comam yiñ iswatx'k'ab Comam Dios. Ha' Comam xin ch'ijban ebnaj ángel yeb xin huntek'anxa

ay ismunil caw ay yelapno ye bey satcañ tu'.

4

Munlahojoñwe haca'tic'a cohelanil ak'bilyu Comam Dios

¹ Yuxin haca' yu yaben Comam Cristo isya'tajil yiñ isnimanil yet iscami, hac tu' xin chu jaben isya'tajil, yuto xacorñcam yinta Comam hañon ti'; ha' ebnaj camnaxa, matxa chaco ismul ebnaj. ² Hacojab tu' chijute coba, coyijewe tzet choche Comam Dios yulbal yet ayori yul sat yibañk'inai ti'. Matxaojab chicowatx'e haca' tzet chiyoche conimanil. ³ Hayet yalarito, niman tiempo quexec' hewatx'e' tzet chiswatx'e anma mach ohtañeho Comam Dios. Wal xin canojab huntek'an tu' tinañ yuto yet yalarito tu', hañech'an istx'ojal chewatx'e, cheyak'ni yub tzet yoche heyanma, chexec'paxo yiñ uc'u te', cheyec'tzen nimeta k'iñ nanxa islowi, caw niman uq'ue cheyuc'canoj. Cheyinipaxayo heba tetej tiox yahbil yu Comam Dios.

⁴ Ha' ebnaj mach ohtañeho Comam Dios tu', chic'ay isc'ul ebnaj yuto matxa chebeybalñe huntek'an istx'ojal chiswatx'e ebnaj, yuxin chibuchwa ebnaj teyiñ. ⁵ Yaj wal huntek'an anma tu', yilal istak'wicañ yiñ ismul yet chiilchati yu Comam ak'bilxa ismunil yilni tzet ch'elico mac itzitz yeb mac camnaxa. ⁶ Wal xin hallax istzoti'al colbanile tet anma camnaxa tu'. Waxañca xacam anma tu' haca' iscam anma yul sat yibañk'inai ti' yet yilchati yu Comam Dios, yaja' yet yaben anma tu' hune' colbanile, ischahnicanu anma tu' isk'inai haca'tic'a isk'inai Comam Dios.

7 Lañianxa yul istiempohal bay chitanilo sunil tzet ye tu', yuxin helanojab cheyute heba, itz'atñeojab henani hetxahli. **8** Yeb xin ay hunxa caw yilal yehi, ha' hexahanñen heba yiñ sunil heyanma, yuto yet xahan chijil coba chiconahulñeto tx'i'al ismul jet anmahil. **9** Hayet ch'apni hunu juxtaj maca hunu janab isk'ana' bay chiwayi, sunilocab heyanma chechahni, yaja' machocab chexoctzotelo yiñ.

10 Ak'we cheja' heba teyet hununex hatatic'a tzet munilal ak'bilxa teyet yu Comam Dios. C'ul cheyute heba yiñ hemunil ak'bilxa teyet yuto nananta hemunil ak'lax yu Comam. **11** Ha' mac chalnic'o Istzoti' Comam Dios xol anma, yilalocab ha' caw ist'iñanil Istzoti' Comam chiyala, yeb xin ha' mac chak' cheja' isba texol, iswatx'eojab yiñ sunil yip ak'bil yu Comam. Hac tu' xin chihallax c'ulla tzoti' yiñ Comam Dios heyu yu tzet iswatx'e Comam Jesucristo. ¡Hallaxojabi ta caw niman yelapno ye Comam Jesucristo! Hañe Comam yet ay yalaxico ismay yeb yip yiñ sunilbal tiempo. ¡Acojab tu'!

Ch'ec'ya' janma yuto ayoñxaco yul isk'ab Comam

12 Wuxtaj wanab hex xahan ay wuhan, mach chic'ay hec'ul yu hunték'an isya'tajil xahul teyibáñ, tajcato chena tato machi bay wal istitico hunték'an tu'. **13** Wal xin, caw tzalahariñwej, yuto ha' hunex cheyabe isya'tajil haca' yak'le Comam Cristo. Yuxin hayet chul Comam xol isk'ak'al yip, caw chiyik'canocañ yip tzalahilal yul heyanma.

¹⁴ Ta chibuchwa anma teyiñ yuto ayexxaco yul isk'ab Comam Cristo, caw c'ul heyet, yuto Yespíritu Comam Dios caw niman yelapno ayxaco teyiñ. Ha' anma tu', chal tzoti' tx'oj yiñ Comam, wal hexpaxo xin cheyal c'ulla tzoti' yiñ Comam. ¹⁵ Ta ayex ch'ec'ya' heyanma, yaja' tañe mach yuho huno potx'wal, maca xin yu elek', macato yu hunu mule caw tx'oj, maca yu heyanico heba xol huno tzet ye tu' mach cheyoc yiñ; ¹⁶ wal ta cheyil isya'tajil yu ayexxaco yul isk'ab Comam Cristo, mach chectx'ixwi. Halwe c'ulla tzoti' yiñ Comam Dios yuto yetxa Cristo heyehi.

¹⁷ Yuto xaichico istiempohal bay chiillax tzet chielico sunil anma, yaja' to jin̄ hañon̄ ayorixaco yul isk'ab Comam Dios chiichico babel, yuxin ta jin̄ chiichicoj, ¿tzettaxca xin ch'elpaxico anma mach chiyijen Istzoti' Comam yet colbanile? ¹⁸ Hañon̄ c'uloñxa yul sat Comam Dios ti' tx'i'al isya'tajil chul jibañ cat cocolchahi, hajxam anma caw machi yelapno Comam yul sat, yeb anma caw tx'oj isbeybal.

¹⁹ Yuxin hayet chihul isya'tajil jibañ, yaj ta hac tu' ch'el yiñ isc'ul Comam Dios, caw yilal janico janma yiñ Comam, machojab chicobej cowatx'en isc'ulal, yuto ha' Comam tu' watx'erñehor̄, caw xin chiyij isba yiñ tzet chiyala.

5

*Huntek'an cuybanile chi'ak'lax tet hunun anma
ayxaco yul isk'ab Comam*

¹ Tinañ xin chiwaltojan huntek'an chejbanile ti' teyet hex anciano hex xol ebnaj uxtaje yul

hunun coñob, yuto haninti'an anciano inpaxo-jan haca' hex tu'. Caw wilan yak'len Comam Cristo isya'tajil, yuxin ay wak'ni cabو inbahan in-chahnihan isc'ulch'anil teyintaj, hune' chito isye-balо isba. ² Haca' hunu naj tañem me', hacojab tu' cheyute hetarien macta ak'bilxa yul hek'ab yuto haca' isme' Comam Dios yehi. Munlaharíwe yiñ sunil heyanma, haca' choche isc'ul Comam Dios, machojab yiñ lañbilal, yeb mach yuñe ch'en melyu yuxin chexmunlahi. Munlaharíwe yiñ tzalahilal, elojab yiñ heyanma hewatx'eni. ³ Mach yahawo cheyute heba yiñ macta chi'ak'lax hetarie. Wal xin yewe c'ulla beybale tet, haxinwal caw c'ul chutepaxo isbeybal. ⁴ Hac tu' xin hayet chihul Comam iswi'ehal jiñ hariori tañem anma hoñ ti', cat cochahni ispaj hune' caw nanxa yoc isc'ulch'anil, hune' tu' machi bak'inal chilahwi.

⁵ Haquex pax tu' hex tzehtaj, yijem cheyute heba tet ebnaj anciano. Chewchotarieojab cheyute heba yet chexcolwa teyiñ hununex, yuto chal yul Yum Comam Dios haca' ti':
Chispahto Comam macta nime winaj chute isba,
walpaxo mac chiyo isba xin, chak' Comam
isc'ulch'anil isc'ul tet,* xiayoj.

⁶ Wal xin iweyo heba yalañ yip Comam Dios, hac tu' xin chexyicañ Comam yet ch'apni istiempo-hal. ⁷ Sunil hebisc'ulal ch'oc yachno yiñ heyanma, aweco yul isk'ab Comam yuto Comam ayñetic'aco yiñ isc'ul coriyilni.

⁸ Caw helan cheyute heba, majwahañwej yuto ha' naj matzwalil, naj ayco ishowal jiñ, lahan naj

* ^{5:5} Pr 3:34

haca' hunu no' balam caw ch'el yaw yet ch'ec' saywal yiñ no' me' yu chisc'uxaytoj. ⁹ Pahweto naj, liñbawe heba yiñ Comam. Heyohtaj tato ha' ebnaj heyuxta yiñ Comam pujanto sunil yul sat yibañk'inal ti', lahan yilni ebnaj isya'tajil haca' hex tu'. ¹⁰ Yaja' hayet chilahwi jaben isya'tajil hanic' tiempohal ti', caw tz'ajan chorielcanico yu Comam Dios, cat xin yak'ni Comam jip yeb colirñban coba, yeb caw t'iñan choriyute Comam awteñeori yetbihoj; yak'nicano isc'ulal isc'ul jet yiñ hunelñe, yuto hunxa je yeb Comam Jesucristo. ¹¹ Hallaxojabi ta caw niman yelapno isbi Comam Dios yiñ sunilbal tiempo. ¡Hacojab tu'!

Chihallaxtoj ta chil isba ebnajjuxta yiñ iscawil

¹² Hune' incartahan chiwatojan teyet ti', ha' juxta Silvano chiinitoj. Naj juxta ti' caw yijem naj sic'lebil yul insatan. Hayeb tzoti' chiwaltot'i'an ha' chexitzeni, yeb xin chiwaltojan teyet tato xáhechah isc'ulch'anil isc'ul Comam Dios. Liñbawe heba yiñ isc'ulch'anil isc'ul Comam.

¹³ Yeb ebnaj juxta ay yul ismajul Babilonia sic'bilxalo yu Comam Dios, haca' yu quexis-sic'niloj, chisk'ambepaxo ebnaj hanic' heye yiñ hecawil. Yebpaxo naj Marcos, naj inc'aholan yiñ isbi Comam, chisk'ambepaxo naj hanic' heye yiñ hecawil. ¹⁴ K'ambewe hanic' heye hununex yuto heyuxtaxa heba.

Ayojab ak'anc'ulal yul heyanma hex ayexxaco yul isk'ab Comam Jesucristo. ¡Acojab tu'!

**Nuevo Testamento yin abxubal
New Testament in Jakalteko Eastern; jac
(GT:jac:Jakalteko)**

copyright © 1997 Wycliffe Bible Translators, Inc.

Language: Jakalteko

Translation by: Wycliffe Bible Translators, Inc.

Copyright Information

© 1997, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Jakalteko

© 1997, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files
dated 29 Jan 2022

b5bce385-9ed7-5701-9edc-e221ef239a1c